

IL FRIÛL E LIS INVASIONS

Ogni mêsi si fâs la lune e ogni dì si impare une. Cussì leint il "Messaggero Veneto" lis discuisizions storichis di ispirazion anti autonomiste di un nestri brâf avocat - che par altri, bisugne d'îlu, al à almancul il merit di savê scrivi par talian cuntune robustece e soliditât di stîl che e je aromai une raritât inte stampe diletantistiche di mode - o vin ancje podût imparâ cualchi robute che no vevin mai cjatade sui libris o intai documents.

O vin capît che cumò il Friûl nol à plui di stâ atent "ai valichi settentrionali" ma a soreli jevât, indulà che la invasion e je bielzà rivade di ca dai "facili passaggi orientali".

Noaltris invezit o crodevin che dutis lis invasions che il Friûl - difindût invincibilmentri di Rome o di Vignesie o de Italie - al à scugnût sopuartâ ca fossin vignudis de bande di soreli jevât (via barbarorum) e no di tramontane: a scomençâ dai Euganis che a rivarin dal Cjanâl dal Lusing e dal Nadison, fintremai ai Gotics, ai Langobarts, ai Ongjarês, ai Turcs, cun Atile, o cun Alboin, o cun Scanderbeg e fintremai aes gloriosis zornadis di Cjaurêt. La uniche ocupazion che e pararès vignude di in sù o crodevin che e fos chês dai Celtics, che no podin clamâju invasôrs, se e je vere che a son lôr, e no i venits, il çoc indulà che e fo incalmade la nestre romanizazion.

Ma chestis e altris di cheste fate, a son cagneris di nuie, che no mudin la sostanza de storie. Chel che no rivin adore di parâ jù pal cuel al è propit il pinsîr fundamentâl dal autôr, che une leç storiche, insuperabil come il destin, e oblei cheste beorcje di trê razis che al è il Friûl, a formâ, pal so interès, une trinçee par difindi la raze mediteranie e penisulâr, cuintri di chês altris dôs, e no invezit un anel di union, cuntun fregul di libertât di moviments, par parâ i sburtons e lis trussadis che chestis razis a àn il brut vizi di dasi tra di lôr. Chest pinsîr nus semee rigjavât di une dople mancjance di sens storic: sul cont dal passat e sul cont dal avignî.

pre Bepo - Patrie dal Friûl / 1946